



Rabu, 28 Oktober 2020

Ogen: 1 Tesalonika 5:17-18



Ertoto Janah Ngataken Bujur



Kerna ertoto rusur isingetken Paulus. I jenda pe mulihi i bas pendungi suratna maka nina man Perpulangan Tesalonika “Ertotolah katawari pe.” Ertina ertoto la erngadi-ngadi, la erpeltep-peltep. Uga carana? Labo maka katawari pe lipat tan, ras tutup mata. Ertoto eme erkomunikasi ras Dibata. Banci arah paksa tertentu ngerana kita man baNa nurike isi pusuhta, janah si begiken KataNa arah ngoge Pustaka Si Badia bagi si lakoken kita genduari enda. Tapi labo si e saja, maka situhuna kai pe si lakoken adi si inget Dibata, janah tujunta pe mpermuliaken Dibata maka si dahiken kita eme bagin pertotonta.

Tetap ertoto singetken Paulus banta pe erkiteken bage hubungenta ras Dibata bene, minter kal kita kote. Janah bagi si isingetken Petrus i bas suratna si pemena bindu 5:8 maka iblis musuhta ta e bagi singa si erdalan ku jah ku je ndarami si man jerngemenna. Ertina, bage kita kote, bage minter italukenna alu kuasana. Emaka tetaplah kita ertoto katawari pe. Janah kataken bujur i bas si ugapana pe. Enda pe adi la siantusi mamang ateta. Uga maksudna ngataken bujur i bas si ugapana pe? Situhuna enda jadi man kalak si tek sabap man kalak si tek kai pe jadi maba kiniulin man bana (bdk. Rm 8:28). La lit si la maba kiniulin i bas kegeluhen enda adi keleng ateta Dibata. Tentuna enda banci idatken alu ngidah ras ngenanami kerina perbahanen Tuhan alu mata kiniteken.

Emaka, erdandanken kerina maba kiniulin man banta alu bage me patut kal kita ngataken bujur i bas si ugapana pe. La erpilihén situasi ras kecibal geluhta, kerina paksa banci si bahan jadi kesempatan ras alasenta ngataken bujur man Dibata. Contohna Paulus sanga ipenjaraken pe maba kiniulin bana ras Berita Si meriah, sabap arah e reh mbarna Berita Si Meriah i bas penjara ndai (Perb. 16:34).